

樂府詩集

二

卷之二

樂府詩集卷第五十六

太原

郭茂倩

編次

舞曲歌辭

雜舞

四時白紵歌

沈約

古今樂錄曰沈約云白紵五章敕臣約造
武帝造後兩句

春白紵

蘭葉參差桃半紅飛芳舞縠戲春風如嬌如怨狀不同
含咲流眄滿堂中翡翠羣飛飛不息願在雲間長比翼
佩服瑤草駐容色舜日堯年懽無極

夏白紵

朱光灼爍照佳人含情送意遙相親嫣然宛轉亂心神
非子之故欲誰因翡翠羣飛飛不息願在雲間長比翼
佩服瑤草駐容色舜日堯年懽無極

秋白紵

白露欲凝草已黃金瑄玉柱響洞房雙心一意俱徊翔
吐情寄君君莫忘翡翠羣飛飛不息願在雲間長比翼
佩服瑤草駐容色舜日堯年懽無極

冬白紵

寒闥晝寢羅幌巫婉容麗心長相知雙去雙還誓不移
長袖拂面爲君施翡翠羣飛飛不息願在雲間長比翼

佩服瑤草駐客色舜日堯年懽無極

夜白紵

秦箏齊瑟燕趙女一朝得意心相許明月如規方襲予
夜長未央歌白紵翡翠羣飛飛不息願在雲間長比翼
佩服瑤草駐客色舜日堯年懽無極

四時白紵歌

隋煬帝

東宮春

洛陽城邊朝日暉天淵池前春鶯歸含露桃花開未飛
臨風楊柳自依依小苑花紅洛水綠歌宛轉繁弦促
長袖逶迤動珠玉千年萬歲陽春曲

江都夏

梅黃雨細麥秋輕
楓樹蕭蕭江水平
飛樓倚觀軒若驚
花簾羅帷當夏清
菱潭落日雙鳧舫
綠水紅妝兩搖漾
還似浮桑碧海上
誰肯空歌採蓮唱

四時白紵歌

虞茂

江都夏

長洲茂苑朝夕池
映日含風結細漪
坐當伏檻紅蓮枝
離軒洞戶青蘋吹
輕幌芳爐鬱金馥
綺簷花簾桃李枝
蘭苔翡翠恒相逐
桂樹鴛鴦恒竝宿

長安秋

露寒臺前曉露清
昆明池水秋色明
搖環動佩出曾城
鳴弦鳳管奏新聲
上林蒲桃合縹緲
甘泉奇樹上蔥青

玉人當歌理清曲婕妤好恩情斷還續

冬白紵歌

元稹

吳宮夜長宮漏歎簾幕四垂燈焰暖西施自舞王自管
雪紵翻翻鶴翎散促節牽繁舞腰嬾舞腰嬾王罷飲蓋
覆西施鳳花錦身作匡牀臂爲枕朝珮撝撝王晏寢酒
醒聞報門無事子胥死後言爲諱近王之臣諭王意笑
越王窮惴惴夜夜抱冰寒不睡

晉杯槃舞歌詩

宋書樂志曰槃舞漢曲也張衡舞賦云歷
七槃而縱躡王粲七釋云七槃陳於廣庭
顏延之云遞間關於槃扇鮑照云七槃起

樂府五十六卷三
長袖皆以七槃爲舞也搜神記云晉太康
中天下爲晉世寧舞矜手以接杯槃而反
覆之此則漢世唯有佻舞而晉加之以杯
反覆也五行志曰其歌云晉世寧舞杯盤
言接杯盤於手上而反覆之至危也杯盤
者酒食之器也而名曰晉世寧者言晉世
之士偷苟於酒食之間而其知不及遠晉
世之寧猶杯盤之在手也唐書樂志曰漢
有盤舞晉世謂之杯盤舞樂府詩云妍袖
陵七盤言舞用盤七枚也

晉世寧四海平普天安樂永大寧四海安天下歡樂治

興隆舞杯盤舞杯盤何翩翩舉坐翻覆壽萬年天與日
終與一左回右轉不相失箏笛悲酒舞疲心中慷慨可
健兒樽酒甘絲竹清願令諸君醉復醒醉復醒時合同
四坐歡樂皆言工絲竹音可不聽亦舞此槃左右輕自
相當合坐歡樂人命長人命長當結友千秋萬歲皆老
壽

右一篇

齊世昌辭

南齊書樂志曰晉杯槃舞歌十解第三解
云舞杯盤何翩翩舉坐翻覆壽萬年其第
一解首句云晉世寧宋改爲宋世寧惡其

杯槃翻覆辭不復取齊改爲齊世昌後一
解辭同唐書樂志曰梁謂之舞盤伎唐隸
散樂部中隋書樂志曰梁三朝樂第二十
一設舞盤伎

齊世昌四海安樂齊太平人命長當結久千秋萬歲皆
老壽

右一曲

宋泰始歌舞曲辭

古今樂錄曰宋泰始歌舞十二曲一曰皇
業頌歌自堯至楚元王高祖世載聖德二
曰聖祖頌三曰明君大雅四曰通國風五

曰天符頌六曰明德頌七曰帝國頌八曰
龍躍大雅九曰淮祥風十曰宋世大雅十
一曰治兵大雅十二曰白紵篇大雅

皇業頌

明帝

皇業浚德建帝運資勲融胤唐重盛軌胄楚載休風堯
帝兆深祥元王衍遐慶積善傳上業祚福啓英聖衰數
隨金祿登曆昌水命維宋垂光烈世美流舞咏

聖祖頌

聖祖惟高德積勲代晉曆永建享鴻基萬古盛音冊睿
文纘宸馭廣運崇帝聲衍德被仁祉畱化洽民靈孝建
締孝業允協天人謀宇內齊政軌宙表燭威流鍾管騰

列聖彝銘賁重猷

明君大雅

虞 鰥

明君應乾數撥亂紐積基民慶來蘇日國頌薰風詩天
步或蹇艱列蕃扇迷慝廟勝數九伐神謨洞七德文教
洗昏俗武誼清祲挺英勲冠帝則萬壽永齊一作衍天

通國風

明 帝

開寶業資賢昌謨明盛弼諧光烈武惟略景王勲南康
華容變政文猛績爰著有左軍三王到氏文武贊丞相
作輔屬伊旦沈栢宗侯皆殄亂泰始開運超百王司徒
驃騎勲德康江安謨效殷誠彰劉沈承規功名揚慶歸
我后祚無疆

天符頌

明帝

天符革運世誕英皇在館神炫旣壯龍驤六鍾集表四
緯駢光於穆配天永休厥祥

明德頌

明帝

明德孚教幽符麗紀山鼎見奇醴液涵祉鵷鵠耀儀騶
虞遊趾福延億祚慶流萬祀

帝圖頌

帝圖凝遠瑞美昭宣濟流月鏡鹿羣霜鮮甘露降和花
雪表年孝德載衍芳風永傳

龍躍大雅

龍躍戎府玉耀蕃宮歲淹豫野璽屬嬪中江波澈映石

柏開文觀毓花藥樓凝景雲白鳥三獲甘液再呈嘉穰
表沃連理協成德充動物道積通神宋業允大靈瑞方
臻

淮祥風

淮祥應賢彥生翼贊中興致太平

宋世大雅

虞 鰥

宋世寧在泰始醉酒歡飽德喜萬國朝上壽酒帝同天
惟長久

治兵大雅

明 帝

王命治兵有征無戰巾拂以淨醜類革面王儀振旅載
戢在辰中虛巾拂四表靜塵

白紵篇大雅

在心曰志發言詩聲成于文被管絲手舞足蹈欣泰時
移風易俗王化基琴角揮韻白雲舒簫韶協音神鳳來
拊擊和節詠在初章曲乍畢情有餘文同軌一道德行
國靖民和禮樂成四縣庭響美勲英八列陞唱貴人聲
舞飾麗華樂客工羅裳映一作較日袂隨風金翠列輝蕙
麝豐淑姿秀一作委體允帝衷

齊明王歌辭

王融

齊明王歌辭七曲王融應司徒教而作也
一曰明王曲二曰聖君曲三曰淶水曲四
曰採菱曲五曰清楚引六曰長歌引七曰

散曲

明王曲

明王日月照至樂天地和幸息雲門吹復歇咸池歌桂
房金匏輦瑤軒絲石羅朱騏步躑躅玄鶴舞蹠露凝
嘉草秀煙度醴泉波皇基方萬祀齊民樂如何

右一曲三解

聖君曲

聖君應昌歷景祚啓休期龍樓神睿道免園仁義基海
蕩萬川集山崖百草滋盤苗成萃止渝韎異來思清明
動離軫威惠一作懷被殊辭大哉君爲后何美唐虞時

右一曲三解

淥水曲

湛露改寒司文鸞變春旭瓊樹落晨紅瑤塘水初淥日
霽沙淑明風動泉華燭遵渚泛蘭觴乘漪弄一作舞清曲
斗酒千金輕寸陰百年促何用盡歡娛王度式如玉

右一曲三解

採菱曲

炎光銷玉殿涼風吹鳳樓雕輜一作青輜僚平隰朱櫂泊安
流金華妝翠羽鷁首畫飛一作龍舟荆姬採菱曲越女江
南謳騰聲翻葉靜發一作散響谷雲浮良時時一遇佳人
難再求

右一曲三解